



9. November 2022

UKA2022/77

Namminersorlutik suliffeqarfiutillit immiaaqqanik, viinninik imigassallu kimittuunik eqqussisinnaangornissaat anguniarlugu Nioqqutissanik eqqussuineq annissuinerlu pillugit Inatsisartut inatsisaat nr. 18, 30. oktober 1992-imeersumut Naalakkersuisut allannguutissatut siunnersuuteqarnissaanik peqquneqassasut Inatsisartut aalajangiiffigisassaattut siunnersuut (Inatsisartunut Ilaasortaq Jens-Frederik Nielsen, Demokraatit)

Siumumiit siunnersuuteqartoq qutsavigalugu imaattumik oqaaseqassaagut.

Siunnersuut tunngaviatigut ilalerluinnaratsigu oqaatigissavara, isumaqaratta inuiaqatigiit kiffaanngissusaat periarfissaallu sutigut tamatigut annertunerusariaqartoq. Qulaaniit aalajangertarneq, periarfissanillu mattussuineq Siumumiit pitsaanngitsuusorigipput oqarusuppunga. Inuiaqatigiit nunarsuarmioqataaleraluttuinnarnitsinni periarfissat annertusiartorneranni avammullu attaveqarneq annertusiartortillugu isumaqarpugut imigassat immiaaqqat viinnit allallu aamma periarfissaasariaqartut tikisissinnaassallugit nioqqutissiat allatulli. Kiffaanngissuseq isumaqartaqaaq periarfissat annertunerit ilorrisimaartitsisarput, niuernerlu pitsaasoq inatsisip uumap periarfissaalissasoq tunngaviatigut isumaqarpugut.

Taamaakkaluartoq illuatungaaticigut Naalakkersuisut aarleqquteqarnerat paasisinnaaluinnarparput, imigassamik atueriaaseq eqqarsaatigalugu pisartut qiviraanni nunatsinni kisitsisit takutinneqartartut pitsaanerpaanngitsut takujuartarpagut. Qularnanngitsumilli inatsit una atuutilerpat susasaqartuni tamani suliassat annertuseriarujussuassasut isumaqarluta. Taamaattumik inatsisip uuma allannguutissartaa mianersortumik sunniutissai eqqartorluarlugu pitsaanerpaamik kingunissaa pitsaasoq eqqarsaatigalugu suliarisariaqartoq isumaqarluta.

Naalakkersuisut allannguutissatut siunnersuutaat soqutiginarluinnarpoq “namminersortut suliffeqarfiutillit” kisiisa pinnagit “innuttaasunut tamanut” oqariartorluta naaperiaanerat ajunngitsuusoq isumaqarluta, tamakku tamaasa qulaajarluarlugit suliarilluarneqarnissaa Siumut tungaaniit kissaatigaarput.

Siumumiit siunnersuut taperserlutigu Naalakkersuisut allannguutissatut siunnersuutaat ataatsimiititaliami nalilersorluarneqarnissaat ilanngukkusullutigu, ataatsimiititaliami susasaqartumi suliarilluarneqarnissaa innersuussutigaaarput.

Lars Poulsen, Siumut